

四庫全書

史部

欽定四庫全書

平定準噶爾方略前編卷三十三

雍正十年冬十一月庚子

大學士伯經略鄂爾泰奏開採硫磺山事宜

鄂爾泰疏言軍中火器最重若火器不精三軍  
難恃以為勇臣經歷邊郡見各標營堡施放鎗  
礮火烟不直且半濃黑知其製藥不中法度曾  
嚴飭所司指示大略惟是揀材質料硝易而磺

難硝賤而礪貴陝甘兩省號稱地不產礪必赴  
他省購買軍需所在接濟維艱查肅州嘉峪關  
金佛寺堡所轄汛地內南山隘口抵朱魯郭迤  
邐而西有硫礪山周圍四五十里遍山產礪若  
遣官開採煎熬如法用之不竭不獨便利軍需  
即陝甘兩省標營所用亦足接濟現與劉於義  
面商遣官經理一面先支銀兩令總兵官沈力  
學開工奏入得

旨開採硫磺固於軍需有益但行之日久不無私販盜  
賣之弊著署督劉於義飭令總兵沈力學派兵防護  
實力稽查俟開採足用後奏聞請旨

命甘肅捐納款項改折本色米石仍不得於本地採買  
大學士伯經略鄂爾泰疏言甘涼肅為軍需要  
區倉儲尤宜充裕請以現行捐納款項改折本  
色米石輸納奏入得

旨邊地改折米石以便積貯於軍需誠為有益但在本

地採買恐價值騰貴轉不便於軍民除甘涼肅本地  
民人援例者准即以所有糧石交納外其他處捐納  
人等俱應由他處運交不但於甘涼肅採買著該督  
等通飭曉諭稽察禁止

辛丑

命以鄂爾多斯等處馬匹專備西路軍需其北路以烏  
喇特等處馬匹應用

上諭辦理軍機大臣等曰西路軍營所需馬匹向由鄂

爾多斯等扎薩克處採買今北路所需馬匹又於彼處採買趕送則西路反致難得矣著將六旗鄂爾多斯所買馬匹停其趕送北路交與各旗牧養豫備西路需用烏喇特烏珠穆泰等處所買馬匹著備北路需用

議發罪人赴軍營附近處屯種并增設臺站車牛

辦理軍機大臣等遵

旨議奏罪人當發黑龍江者有

旨改發北路軍營屯種予以自新請嗣後改發軍營附近處一切衣食如康熙五十八年例令所在酌給當發時由京城撥兵遞送赴軍罪人在途或妄行不法即於該處立斬至沿途臺站所需車輛牛隻向已裁去應請如前增設奏入

上從之

已酉

命伊禮布統轄額塞勒津城等處兵駐劄哈爾垓圖諾  
穆圖等專辦修城種地事務

工部左侍郎原署西安巡撫馬爾泰奏言額塞  
勒津城介在山谷中四面人馬往來不見踪跡  
哈爾垓圖乃諸路隘口所會水草亦佳請撤額  
塞勒津城所駐步兵并發西寧大通馬步兵合  
二千人赴哈爾垓圖詳閱耕種地方令兵丁開  
墾其一切修葺城堡專令諾穆圖傳寧辦理再



董科爾寺與西寧逼近既設一叅將率兵五百駐劄無庸增兵阿布海雅蘇地氣甚寒駐兵不便扎噶素台所在水草尚佳請每年十月初臣與達鼎二人輪班率西安綠旗兵一千京師滿洲兵二百現在西寧者赴扎噶素台等處駐劄策應至正月仍還西寧辦理軍機大臣等議如所請奏入得

旨哈爾喀圖地方駐劄兵丁著伊禮布統領尹扎納管

承澤協同管理修城種地事務著諾穆圖傳寧辦理  
命四川兵調赴軍前者各歸汛地

工部左侍郎原署西安巡撫馬爾泰奏言由四  
川調赴多巴駐劄兵二千不耐天寒所乘悉川  
馬出口既非所宜置之西寧徒費糧草查西寧  
大通二處除出征及預備兵丁外尚六千餘防  
守已足若更需兵現今涼州有直隸河南兵一  
千足支調遣請令四川兵各回所在汛地辦理

軍機大臣等議如所請奏入

上從之

辛亥

命革陳天培等職

署陝西巡撫史貽直奏言統轄勇健營兵丁提督陳天培總兵官徐起鳳罷軟廢弛不能約束兵丁致令沿途生事總兵官周一德明白諳練紀律森嚴可以管領勇健營兵丁赴軍辦理軍

機大臣等議如所請奏入得

旨依議陳天培徐起鳳俱著革職

十二月甲寅朔

上諭理藩院曰額駙策凌之馬羣今年被賊騷擾著於  
口外官馬羣內賞給馬二千匹牛一千頭羊五千隻  
再額駙屬下人等之產業有被賊騷擾者曾否另行  
賞給已經飭查爾等再行知順承親王務令饒裕均  
沾實惠

乙卯

命卹賞陣亡大臣副將軍尚書查弼納等

吏部議奏據兵部咨靖邊大將軍和碩順承親  
王錫保造陣亡大臣等冊送部請照例給予世  
職查副將軍尚書查弼納叅贊內大臣馬爾薩  
副都統蘇圖覺羅海蘭應授騎都尉兼雲騎尉  
散秩大臣一等公達福副都統戴豪西彌賴常  
祿前鋒統領丁壽侍郎永國應授騎都尉二等

侍衛德明等一百十八人及領催委署章京傅  
成格等十六人並應授雲騎尉其祭葬銀兩各  
按品級卹賞如例奏入

上從之

辛酉

命增撥車臣汗兵丁簡派訓練保守游牧並收輯巴爾  
虎等遁逃者

上諭辦理軍機大臣等曰從前車臣汗部落兵丁曾派

撥三千名隨軍額爾得尼招地方交戰時惟有一千二百餘名其餘一千八百名俱行逃回續經順承親王奏請派撥車臣汗部落兵一千名前赴軍營現已准行爾等可行文特古忒除軍營所有車臣汗兵一千名與明年換班兵一千名外再另派三千名令查克旦阿敏道帶領在伊等游牧西界操練則於保守游牧諸事大有裨益如不能足三千之數或一千或二千俱可著特古忒會同王吹扎卜及扎薩克等公

同撥派又聞得從前貝子顏楚卜多爾濟旗分及扎薩克台吉沙克都爾扎卜旗分之巴爾虎等潛逃俄羅斯地方彼處不容伊等入境仍往我卡倫外竊取喀爾喀等什物特古忒現在車臣汗部落著會同王吹扎卜扎薩克等將脫逃之巴爾虎作何收回之處商議辦理收回時著查克旦阿敏道開導理法加意訓練

癸亥



靖邊大將軍順承親王錫保奏報鄂爾昆扎克  
拜達里克等處屯田收穫大小麥糜九千四百  
石有奇奏入得

旨下部知之

丙寅

授西路副將軍張廣泗為正紅旗漢軍都統仍留軍營

丁卯

命正馬爾賽縱賊失機罪

靖邊大將軍順承親王錫保等遵

旨議奏馬爾賽負

恩縱寇不忠不孝予以誅戮不足蔽辜臣等傳集軍中

文武以下恭宣

命旨詳加詢問莫不衆口同聲以為允當李杕曾獲重  
愆棄瑕錄用乃復懷姦濟惡為國法所不容應  
將馬爾賽李杕即正典刑以昭憲典兵部等議  
奏馬爾賽世受

欽定四庫全書

平定縣志 卷三十三

國恩身邀異數為北路將軍手握重兵坐觀賊遁  
有心債事貽誤軍機應將馬爾賽臬示軍前李  
杜庸懦卑狡與馬爾賽同惡相濟應請按律一  
并正法奏入得

旨馬爾賽著即處斬免其臬示李杜著在軍前監候秋  
後處決隨

命副都統索林奏事郎中張文彬馳驛前赴扎克拜達  
里克軍營將馬爾賽正法

己巳

上諭辦理軍機大臣等曰此次賊人大敗現今歸化城  
無備兵之事著將撫遠大將軍印信移取回京收貯  
康親王崇安不必前往

命獎賞索倫營總等出征奮勇者

額駙策凌奏言索倫兵丁擊賊者已蒙

恩賞賚此次營總章京等人奮勇自効請特加優賞  
以示鼓勵辦理軍機大臣等議覆曰應如所請

索倫營總班圖巴爾孟古海薩勒圖並以副都  
統銜授之仍同布爾沙管轄索倫兵丁營總那  
斯泰等佐領克什克圖章京布賴等給予孔雀  
翎領催達魯察等給予藍翎奏入

上從之

庚午

命安插吐魯番回人於瓜州

上諭辦理軍機大臣等曰從前署大將軍查郎阿摺奏

請將吐魯番回衆在肅州所屬王子莊安插經廷議  
令署總督劉於義等確勘詳查妥協辦理朕思回民  
等輸誠嚮化自應選給水土饒衍氣候和煦之地俾  
得樂業安居肅州之王子莊水泉甚少可墾之地不  
敷回民耕種查瓜州地土肥饒水泉滋潤氣候亦和  
與回民原住地方風景相似且現在開墾可種之地  
甚為寬闊足資回民耕收由塔勒納沁遷至瓜州路  
不甚遠可免跋涉之勞著署總督劉於義巡撫許容

將吐魯番回衆即于瓜州安插其築堡造房給與口糧牛種等項亦即行估辦交原任潼商道王全臣料理再令查郎阿即於軍營派一武職大員先赴瓜州會同王全臣悉心妥辦回衆自塔勒納沁遷移之時著提督顏清如沿途照看至瓜州安插事畢顏清如仍回軍營辦事

署寧遠大將軍查郎阿奏報巴里坤圖古里克等處屯田收穫青稞一萬二千六百石有奇魯

克察克屯田收穫糜麥三千六百石有奇奏入  
得

旨下部知之

癸酉

喀爾喀扎薩克多羅貝勒車木楚克納木扎爾  
卒以其子成衮扎布襲爵喀爾喀扎薩克固山  
貝子策旺諾爾布以老疾乞休封其子車木楚  
克扎卜為扎薩克鎮國公



丁丑

授營總疾爾璫副都統銜仍留軍營

署陝西總督劉於義奏請暫緩甘州新募兵赴

金塔寺

劉於義疏言前者臣以金塔寺地要兵單請調  
高臺滿洲兵五百移駐其地廷議以高臺兵明  
春當赴大營請撥甘州提標新募兵往金塔寺  
駐劄甚當但臣一面奏



効著授為內大臣

雍正十一年春正月丁亥

命甄別勇健營兵丁

署陝西總督劉於義疏言陝西勇健營兵丁請  
令總兵官周一德等甄別選汰其驕悍難馴者  
遣還原籍辦理軍機大臣等議如所請奏入得  
旨朕前以各省民人內必有人材壯健文勇可觀願為  
國家効力以圖上進者是以特降諭旨令各省督撫

召募揀選送京訓練以備軍旅之用伊等如果能奮  
勇出力建績立功將來俱可為干城之寄故疊加恩  
賚於應募後即各給守糧一分贍養家口到京後撥  
給房屋居住月餉銀米從優給發起程赴陝又各賞  
衣裝路費銀兩暫令駐劄近邊地方以候差用俾伊  
等各展効力之心並圖進身之路是朕加恩於勇健  
兵者至為優渥伊等各自揣量實為過分乃其中多  
有放縱驕悍生事不法者上年到京即不安本分肆

行爭鬪及令赴陝沿途又復生事騷擾該督撫曾具摺參奏而駐劄甘州之後竟有私自脫逃之人陳天培又經具奏此等無賴之徒固由各省督撫不慎重揀選濫募充數總統大員不能嚴行約束整飭教導而在伊等受恩而不知感自甘廢棄冥頑惡劣即令調赴大營亦不可用著總兵周一德即行甄別挑汰遞回本籍交該地方官嚴加收管不令出境生事若有心懷怨望捏造浮言并恃強肆橫鬪毆不法等事

該地方官立即拘拏稟知督撫提鎮一面奏聞一面  
按法究治至於挑存可用之人俱應感激朕恩遵循  
法紀嗣後益加黽勉努力戒行以圖上進朕必加以  
恩澤著將此旨曉諭知悉

庚寅

議洪郭爾鄂隆等處駐兵防守事宜

侍郎納延泰奏言臣等與喀爾喀扎薩克圖汗  
格勒克雅木丕勒等詳議駐兵所在查洪郭爾

鄂隆可駐兵一千其東南百餘里外圖伯策克  
可駐兵二千西面沿西巴爾台河一帶至濟爾  
噶朗圖可駐兵三千既可以固喀爾喀游牧亦  
足控禦阿濟諸路請令都統哈達哈副都統綽  
爾多等即率兵於青草發生時啓行分赴所在  
駐劄奏入

上從之

戊戌

命優卹副將楊馥等

上諭內閣曰大定副將楊馥統兵擊賊奮勇先登為暗鎗所傷其忠義之氣甚屬可嘉伊子楊恒新現在軍前技勇頗優亦甚有志氣著授為遊擊不必在軍前効力遇有遊擊缺出即行題補平越營遊擊羅資袞以帶兵應援勇往被害深可憫惻伊子羅雲標現在隨征効力著授為守備該督等酌量題補至楊馥羅資袞應得卹典俟事竣題報到日仍照例賞給



庚子

命大學士伯鄂爾泰赴北路經略軍務

命山西大同總兵官張朝良陝西涼州總兵官楊琰赴

西路軍營

壬寅

命陝西各營餘項悉令歸公濟用以杜攤派剋扣之弊  
上諭內閣曰甘涼肅等處兵丁本年應支糧料草束例  
應折給銀兩自行採買朕因甘省年來辦理軍需食

物昂貴兵丁所領銀兩恐不敷用特令加倍增給以示格外之恩提鎮大員自應體朕軫恤兵丁至意悉心料理加意愛養近聞弁員中尚有營私瞻徇凡於過往應酬及一切雜費俱於各兵攤派即如甘提馬廠每年尚有餘利若盡歸公用於兵丁不無小補前任提督宋可進祇知網利不恤兵艱剋扣餉銀濫用公帑各鎮將弁未必不做倣而行著署督劉於義侍郎杭奕祿嚴飭陝甘提鎮將營中所有除各官俸薪

及親丁名糧外凡有餘利俱歸公用接濟兵丁不得  
絲毫乾沒入已亦不得借公費等項名色攤派署提  
督劉世明受恩深重尤當實力奉行毋得仍蹈故轍  
自取罪戾嗣後弁員有私派侵蝕等弊該署督等即  
行叅奏并將該管提鎮一并叅處

策登扎卜請赴軍前効力

上許之

上諭理藩院曰喀爾喀貝勒策登扎卜懇請願往軍前

効力著照所請前往伊帶往之兵丁百人馬匹行糧  
准照內地兵丁之例支給

甲辰

喀爾喀固山貝子佛保陷賊未歸以其兄沙克  
都爾扎卜襲爵

丁未

增設安西兵備道一員

左副都御史二格奏言自肅州抵哈密計程千

五百里其間沙州安西等處舊隸肅州道按肅  
州道駐肅事務尤繁不能遠制邊外現今安西  
屯田又令吐魯番回人於瓜州安插必得大員  
就近彈壓撫導為便戶部議覆曰應如所請增  
設安西兵備道一員其舊設安西同知移駐瓜  
州辦理水利屯田與靖逆通判及四衛一所並  
隸安西道奏入

上從之

二月戊午

命以吹扎卜襲封車臣汗

理藩院奏言車臣汗策卜登班珠爾人不稱職  
請以扎薩克多羅郡王吹扎卜署理印信奏入  
得

旨車臣汗名號即著吹扎卜承襲

已未

命公豐盛額統領赴洪郭爾鄂隆等處兵

上諭辦理軍機大臣等曰額駙策凌去時曾奏請將都統哈達哈遣往北路軍營從前派往洪郭爾鄂隆等處駐劄兵丁曾著侯馬蘭泰管轄今馬蘭泰不必前去著留京在辦理軍機處行走伊所挑馬場兵一千名著副都統黑色於四月間由馬場起程至歸化城會同哈達哈等管領前往洪郭爾鄂隆駐劄哈達哈既往北路軍營此兵著派公豐盛額總統酌量哈達哈赴洪郭爾鄂隆之時豐盛額再由京起程

庚申

飭諭軍營將弁等

上諭內閣曰古云兵可百年不用不可一日不備所謂  
備者非徒操練技勇演習行陣而已如馬匹軍裝礮  
火器械軍行必需之物一一預備於平時及有事調  
撥便可刻期起行不至拮据延緩此乃設兵之本意  
也我國家承平日久武備漸弛年來朕屢降諭旨諄  
諄訓飭雖該管大臣等稍知以訓練為務然馬力不



足資裝器具不周每聞派遣之信勉強周章遷延時日所謂預備者但有虛名而無實濟此則該大臣所當深知痛改如意整理者又如營中有必需之匠役不得不酌量給與兵糧數名以資養贍而將弁等每多借此名目將水火夫役等人多佔名糧又每將精壯兵丁多派為親隨不令當差及遇頭目把總缺出即於此內拔補以致荷戈持戟者差使繁多而不得上進之路朕向知此弊已屢降諭旨切加申飭近聞

此風仍未全改亦著該管大臣嚴行查察毋得姑容  
又聞各營中間有公中餘利如甘州提標馬廠之類  
原係存公備用而該管將弁往往據為己有收入私  
橐遇有過往應酬及營中雜費仍攤派兵丁而不卹  
其艱苦此弊尤當禁革今再行曉諭儻敢視為具文  
仍蹈前轍勿謂罰不加衆希冀苟免其情罪輕者照  
例處分情罪重者必在本地正法

壬戌

命喀爾吉善以護軍統領原品赴洪郭爾鄂隆軍

上諭辦理軍機大臣等曰原任護軍統領喀爾吉善久歷戎行伊願往軍前効力著賞給原品令往洪郭爾鄂隆軍前協助公豐盛額行走賞銀一千兩

甲子

命革喇嘛扎卜爵以其弟得親扎卜襲封扎薩克和碩親王

上諭理藩院曰喇嘛扎卜前年一聞賊信即駭然驚潰

及戰於克爾森齊老地方棄軍奔往游牧處所朕恐  
此中別有情節令其來京訊問伊竟無一語置對甚  
屬怯懦無恥著革去扎薩克和碩親王令伊弟得親  
扎卜承襲撤回一佐領賞給額駙策凌喇嘛扎卜著  
交該衙門議處尋議喇嘛扎卜為喀爾喀部落親王  
盟長不思訓勵屬人効力軍事遇敵退縮應按  
律正法奏入得

旨喇嘛扎卜理應照議治罪但伊祖親王善巴於喀爾

喀未定之先即輸誠歸順後於軍事甚屬効力是以  
聖祖仁皇帝加恩於喇嘛扎卜備極愛養著從寬免死  
在京永遠監禁

丙子

命分別賞賚額爾得尼招破賊官兵銀九萬九千兩有  
奇

命正阿三臨陣退縮罪

先是靖邊大將軍順承親王叅奏振武將軍傅

爾丹於烏遜珠勒遇賊並未身先督戰以致士卒怯走歸營原任副都統阿三推委退縮一與賊遇首先奔北辦理軍機大臣等議覆曰應以傳爾丹阿三付三法司定擬具奏順承親王錫保不能籌畫指示應交宗人府議處奏入得

旨烏遜珠勒對壘情形朕曾細問額駙策凌傳爾丹情罪尚有可原從寬免其治罪著留軍營聽大將軍等調遣効力贖罪行走阿三前歲同陳泰貽誤軍機朕

曾加恩免其治罪今據大將軍叅奏情由甚屬可惡  
已在軍前取有確供文三法司定擬具奏餘依議至  
是刑部等議曰原任副都統阿三於大將軍調  
遣時托故後期遇賊奔北貽誤軍機應即於軍  
前正法奏入

上從之

平定準噶爾方略前編卷三十三

欽定四庫全書

平定準噶爾方略前編卷三十四

雍正十一年三月壬午朔

命量撒駐藏兵

上諭辦理軍機大臣等曰西藏駐劄弁兵本為保護唐古忒人等以防準噶爾賊夷侵犯而設比來賊夷大敗徒步奔逃力蹙勢窮不能遠涉藏地則其無力進兵可知且頗羅鼐輸誠効力唐古忒之兵亦較前氣



壯現今藏地無事兵丁多集則米穀錢糧一切費用等項雖給自內地而唐古忒人等不免解送之勞朕意量其足以防守藏地留兵數百名餘者盡行撤回其留藏之兵著總兵官周起鳳帶領駐劄青保馬拉苗壽著總理藏務至此項兵應撤若干應否將駐劄察木多之雲南兵丁一併撤回著詳議具奏尋議曰駐藏四川兵二千應留五百守護餘悉撤還本處所留兵俟三年後仍撥四川官兵更代其察

木多所駐雲南兵一千本為援藏而設今既量  
撤駐藏兵丁雲南兵亦應撤還五百如四川例  
三年更代奏入

上從之

己丑

命黜沙津達賴爵効力贖罪

理藩院劾奏土默特輔國公沙津達賴前在和  
通呼爾哈臨戰遁歸又於烏遜珠勒敗北請黜

其爵奏入得

旨沙津達賴著革去輔國公在軍前効力贖罪

乙巳

辦理軍機大臣等疏言閱靖邊大將軍順承親王所報陣亡官兵冊與傅爾丹所奏原冊彼此互異應以前報陣亡今云未還者傳令官兵家屬知之其已給卹賞銀追繳如數所給世職亦暫停其承襲奏入得

旨傳爾丹身為將軍草率查奏而該管大臣等官亦任意捏報是錯誤之咎自在傳爾丹等與該官兵無涉所賞銀兩不必追繳其應給世職著暫停承襲

丙午

命以恭格薩木丕勒襲封扎薩克多羅郡王

上諭理藩院曰喀爾喀多羅郡王吹扎卜既承襲車臣汗名號其扎薩克多羅郡王著伊弟恭格薩木丕勒承襲

命賞給車臣汗吹扎卜親王俸

上諭理藩院曰喀爾喀車臣汗吹扎卜具奏懇請俸祿從前未給喀爾喀汗等俸祿者蓋欲伊等各守舊業不令同衆扎薩克王等一例將屬下人等另編旗分佐領是以未給俸祿今車臣汗吹扎卜既以請給具奏著給與親王之俸每年加賞銀二千五百兩其圖謝圖汗扎薩克圖汗亦著行文詢問伊等若不願請俸仍守舊業各聽其便若情願請俸亦著照車臣汗

吹扎卜之例賞給

喀爾喀扎薩克貝勒車木楚克納木扎爾陣亡  
命遣官致祭

庚戌

命以通政使司左參議徐杞署陝西甘肅布政使仍辦  
理噶斯軍需事務

夏四月甲寅

命削郡王查木陽爵以貝勒赴軍前効力降貝子齊旺

班珠爾羅卜藏為輔國公

上諭理藩院曰鄂爾多斯郡王查木陽身為副將軍並不將伊屬下精兵派出且遲延日期疎脫兵丁甚屬不合著削去郡王授為貝勒發往軍前効力贖罪貝子齊旺班珠爾羅卜藏於伊屬下派兵時並不詳慎以致逃回甚屬急急著降二等授為輔國公

戊午

命嚴禁造作浮言者

上諭辦理軍機大臣等曰從來造作言語煽惑人心者  
律有不赦之條若在軍前造言傳播其罪更重應照  
軍法即正典刑此自古相傳之憲典也數年以來西  
北兩路用兵征討準噶爾該管大臣官員等居心怠  
忽辦理粗疎號令不嚴稽察不密間有不肖之人在  
軍營各處捏造全無影響之談或稱京師近有某事  
或稱某營近有某事一人倡先衆口附和愚昧之人  
不能辨別信以為實而該管之大臣官員等雖心知



其非往往以為難於根究希圖省事置之不問遂致  
若輩肆口流傳全無忌憚又有從軍營回來之人造  
作言語以惑亂在京之聽聞如此等事不但有妨於  
公務亦且大害於人心不可不嚴加禁約著行文各  
路將軍令其詳細曉諭該管弁兵及跟役買賣人等  
嗣後倘有造作浮言者必將為首之人究出姓名奏  
聞請旨即於本處正法示衆其失於覺察之該管官  
弁一併治罪若能查出叅奏免其議處至在京造言

生事之人交與步軍統領八旗大臣五城御史順天府先期曉諭倘怙惡不悛即行查拏從重治罪

命馬蘭泰赴洪郭爾鄂隆軍前効力

上諭辦理軍機大臣等曰朕從前以侯馬蘭泰於去年賊至推河時領兵截殺奮勇成功故將伊調回留朕左右令其學習辦事近聞軍前人等俱喧傳馬蘭泰一聞賊至甚是畏怯喀爾喀協理台吉遜都卜再四跪請出戰始行遣往馬蘭泰出營行未二十里即回

欽定四庫全書

平定回疆方略卷三十四

朕將此問馬蘭泰據奏係人捏造陷害之語此事日  
後自有分曉馬蘭泰軍前事務尚未完結著仍往洪  
郭爾鄂隆地方督兵操演効力行走公豐盛額不必  
前去

庚申

議烏里雅蘇台築城駐兵事宜

靖邊大將軍順承親王錫保等奏言察罕度爾  
當阿爾台諸路要道建城駐兵歷有年所以柴

草不足移駐阿勒達爾托羅海其後柴草亦不足用去年又移軍至烏里雅蘇台此外尚有額得爾齊得爾特爾啟塔米爾等處地亦寬濶然並在杭愛山陽與內地近至特斯等處僻在迤北若賊人由南路來犯邀截堵禦呼應不靈並不便駐劄大兵今已於烏里雅蘇台山頭各建礮臺其左近並令滿洲蒙古兵駐劄且特斯台西里各有駐兵萬人賊人不敢逼近應請即於

烏里雅蘇台內外植木中實以土建築城垣城  
中設倉置庫明歲青草發生時調集官駝以察  
罕度爾所貯錢糧米石軍裝火藥等物陸續運  
送辦理軍機大臣等議覆應悉如所請奏入  
上從之

辛酉

命革達爾濟職以吉當阿為將軍赴推河

靖邊大將軍順承親王錫保大學士伯經略鄂

爾泰奏言達爾濟身為將軍沿途牧放馬匹並不加意以致損傷及到扎克拜達里克聞賊人敗走並不截殺反疾驅馬匹赴營損傷更甚既而坐視賊遁又不尾追賊人盡去始以一出博追擊之名旋即還營回奏時乃借端巧飾情屬可惡請以達爾濟交部嚴加議處辦理軍機大臣等議如所請奏入得

旨達爾濟著革職令為護軍交與順承親王凡有苦差

効力之處令其前往贖罪行走達爾濟員缺著護軍統領吉當阿前往推河領兵駐劄

丙子

命加賞克爾森齊老地方交戰獲傷等兵丁

上諭辦理軍機大臣等曰聞順承親王賞賚此次効力兵丁將在克爾森齊老地方交戰獲傷及因患病馬疲未至額爾得尼招地方之兵丁俱不准賞給以已經交戰之人不沾賞賚殊未均平著行文順承親王

查明給賞以示鼓勵

命選呼倫貝爾兵二千赴察罕度爾軍營

上諭辦理軍機大臣等曰據大學士鄂爾泰等奏請將駐劄呼倫貝爾地方索倫巴爾虎兵三千名內調撥二千名前往察罕度爾軍營其軍營現在所有殘疾兵丁應行裁退等語著照鄂爾泰等所請於呼倫貝爾兵內挑選二千名著黑龍江將軍卓爾海帶領前往軍營卓爾海到軍營後再回任所其料理兵丁起



程選派官員管轄應於何日起程之處著卓爾海酌量議奏其餘兵一千名著博第達巴哈統領照管伊等游牧妻子產業黑龍江將軍印務著奉天將軍那蘇圖馳驛前往署理奉天將軍印務著尚書海壽馳驛前往署理刑部尚書事務著公慶復署理海壽到盛京後那蘇圖再往齊齊哈爾俟卓爾海自軍營回任之日那蘇圖海壽各回任所

戊寅

命製帳房五千架皮衣皮帽帶各二萬件賞給北路軍

營兵丁

庚辰

命各路軍營有分檔開戶從征者許編為另戶

上諭辦理軍機大臣等曰家選兵丁前往軍營之時朕降恩旨凱旋之日將伊等妻子俱令出本主之家編為另戶但各路軍營從征人內亦有分檔開戶之人充當領催披甲者伊等久在軍營辛苦効力甚屬可

憫著各路軍營將軍大臣等將効力行走好者以伊等姓名註冊俟大兵凱旋之日亦照家選兵丁例編為另戶

五月壬辰

命護軍統領吳禮布回京以散秩大臣塞楞侍讀學士巴特瑪辦理達里剛愛軍營事務

乙未

預籌進兵事宜

大學士伯經略鄂爾泰奏言特斯台西里兩處  
駐兵原為截殺賊人而設今賊已大創勢不再  
來其地無庸駐兵明年大兵進阿爾台乘機剿  
賊今年秋應緩行至科卜多擇有水草處駐劄  
則人畜不致勞苦臨發時人給兩月糧以官駝  
裝載餘八月糧尚需八萬石應令范毓麟陸續  
輓赴再特斯台錫里既不駐兵應停兩處修堡  
於扎卜堪察罕鄂羅木更築一堡照應臺站運

路大兵進剿必當發兵接應應於塔奔托羅海  
額克阿喇勒墨爾根西納所在各駐兵四千明  
年大兵進阿爾台即令此兵赴科卜多以備調  
遣此次進兵關係緊要請令副將軍額駙策凌  
塔爾岱常德等會同辦理其掌管副將軍印信  
恭候

欽命辦理軍機大臣等議覆如所請奏入得

旨靖邊左副將軍印務著額駙策凌掌管靖邊右副將

軍印務著塔爾岱掌管副將軍常德著與額駙策凌  
同行議政大臣永福著授為內大臣與塔爾岱同行  
己亥

命增給兵丁羊價口糧

靖邊大將軍順承親王錫保等奏言京城各省  
官兵喀爾喀兵每月羊價請增定為一兩京城  
各省及歸化城之土默特兵每月所給口糧增  
定為一斗八升內地扎薩克兵丁每年增給四

月羊隻辦理軍機大臣等議覆如所請奏入  
上從之

乙巳

命免西路綠旗兵丁在軍前病故者支借月餉庫銀  
上諭辦理軍機大臣等曰北路所派四省綠旗官兵有  
在軍前病故者其本營於未奉部文之前家口所領  
月餉朕已於上年八月降旨免其追還今思西路亦  
有調撥別省之綠旗兵丁其中豈無在軍前病故者

若將本營未奉部文之先伊等家口所領月餉按日著追實為可憫著行文各該省若有軍前病故兵丁月餉於未奉部文之前已經支領者免其追還倘有借給庫銀之處著以該省司庫存公銀兩代為補項

已酉

命正紀成斌失機縱賊負

恩悞國之罪

先是署寧遠大將軍查郎阿劾奏言巴里坤軍



營駐劄重兵度集及烏克克嶺二處卡倫亂山環繞路逕錯雜最易藏奸是以專令副將紀成斌駐劄度集總兵張元佐駐劄烏克克嶺乃紀成斌等漫無偵察一任賊人潛藏亂山中忽於度集卡倫白楊溝等處劫我糧車一輛空車四輛及車戶人等由洮賚庫圖爾庫逃去所有副將紀成斌等抗違玩愒總兵官張元佐等任意疎忽謹據實劾奏辦理軍機大臣等議曰紀成

斌負

恩縱賊漫視軍務應請革職按律究擬張元佐等請  
一併交部察議奏入得

旨依議紀成斌著革職交三法司核擬具奏至是刑部  
等議曰前者紀成斌失機縱賊即應明正典刑  
蒙

恩寬宥留軍前効力乃於分駐庫集卡倫時故違將  
令聽賊潛匿隘口復不撥兵護送糧車以致被

初核其前後情罪有心僨事玩法負

恩紀成斌應斬立決張元佐應降三級調用仍留軍

營効力贖罪奏入得

旨紀成斌本由行伍蒙

聖祖仁皇帝恩擢至叅將之職雍正元年朕因年羹堯  
保薦用為副將旋即補授總兵官特陞提督實為逾  
格之恩嗣因西陲用兵關係重大協贊務得其人岳  
鍾琪薦其素嫻軍旅可以任用朕亦料其重受國恩

自必力圖報効因委以協贊軍務之重寄雍正八年  
岳鍾琪進京陛見將大將軍印務令伊護理伊當此  
大任應益加敬謹悉心籌畫於緊要卡倫嚴密偵探  
思患豫防庶可上報國恩下稱職守詎伊昏庸懦怯  
玩愒性成以軍國大事視同膜外致賊人覘其疎忽  
乘隙侵擾卡倫損傷將弁戕害士卒掠去馬駝羊隻  
鎗礮器械口糧無算伊身在大營掌握重兵恐懼驚  
惶一籌莫展聽賊衆往來如入無人之境西路軍威

因此大損且致逆賊資我馬駝器械得於次年侵犯  
北路是兩路軍營之被賊擾掠者皆紀成斌之貽害  
也彼時在廷大臣即奏請將紀成斌明正典刑以肅  
軍紀朕猶予以自新之路特降諭旨暫緩治罪俟事  
竣再定實望其抒誠勉力稍贖前愆乃伊獲罪後在  
營一載仍無愧悔効力之心朕始降旨將伊革去提  
督降為副將凡有差遣令其盡力行走若仍不知改  
悔必究其前案重處所諭甚明伊若稍有人心自應

感恩畏法洗滌肺腸以圖後効乃於雍正十年正月賊犯哈密之時同曹勦領兵堵截遇賊於二堡之西仍復畏縮不前致賊免脫尚敢扶同曹勦捏報力戰朦混掩飾今於伊駐防處集卡倫又敢故違將令漠視軍務以致車輛被劫是紀成斌所至之地在在疎防無不失機養寇既不思從前獲罪之重大亦不念曲加寬宥之深恩冥頑不靈悞公債事核其前後情罪實無可貸著署大將軍等將紀成斌即於軍營處

斬以為將弁失機縱賊負恩悞國者戒餘依議

六月癸亥

命加恩賞給勇健營兵丁

上諭辦理軍機大臣等曰各省挑選之勇健兵丁原冀其黽勉出力各圖上進之路以膺國家厚澤因其中賢愚不等優劣不齊不得不甄別淘汰以示勸懲今挑出赴營各兵既循分守法有奮勇効力之心著給與馬步戰糧俾得內外充裕其自甘起程之時每人

借支銀兩並上年十月借過等項俱著賞給免其在  
月餉內坐扣以示朕格外加恩之至意著勇健營總  
統周一德等曉諭各兵知悉

甲子

上諭理藩院曰策旺扎卜係西路喀爾喀汗兼副將軍  
乃與賊交戰畏懼敗回擾動衆心匆遽移居內地又  
並不約束屬下人等肆行偷盜官糧牲畜騷擾貿易  
人等甚玷國家養育之恩理應即行正法但念伊祖



父原係喀爾喀內之汗累代敬順朕不忍正法將策旺扎卜從寬免死監禁

癸酉

命副都統莫爾渾來京以軍前內大臣叅贊顧魯統轄赴巴里坤察哈爾兵丁

丁丑

命兵部尚書性桂內閣學士雙喜赴北路軍營與原任工部侍郎巴泰協理軍需事務

秋七月辛巳

命革杭奕祿職

上諭內閣曰禮部侍郎杭奕祿係朕特差稽查沿邊營伍之大臣理宜體恤弁兵潔已奉公以副委任乃聞其沿途驕奢放縱擾累兵民甚屬溺職著革職

命調齊齊哈爾副都統王常為山西右衛左翼副都統以副都統職銜布爾沙為齊齊哈爾副都統並留軍營

乙酉

命額駙策凌辦理進兵事務以貝子阿努里署喀爾喀

中路副將軍印

丙戌

命羅卜藏襲封扎薩克多羅杜楞郡王

上諭理藩院曰翁牛特郡王鄂齊爾諸子內貝勒羅卜

藏在軍前甚屬効力著承襲扎薩克多羅杜楞郡王

料理伊父喪事畢仍在軍前辦事其原襲之貝子著

伊兄額爾德尼承襲暫署理扎薩克印務

戊子

命多羅平郡王福彭為定邊大將軍

勅諭曰奉

天伐罪治世之常經鋤暴除兇安邊之速略逆賊噶爾丹策零狂悖冥頑父子濟惡妄欲侵陵我屬國窺伺我邊陲包藏逆心狡焉思逞朕以此賊不除終為衆蒙古之巨患是以命將興師聲罪致討乃數年以來

錫保調度無方制防鮮術因循退縮坐失機宜為將士之所輕致軍心之不振深負任使有忝元戎上年賊兵深入我境副將軍和碩親王額駙策凌內大臣塔爾岱督率弁兵奮勇追擊大殲賊衆丕振軍聲當此乘機決勝之時必須另簡忠誠任事之親藩始克奏膚功而寧邊塞是用命爾為定邊大將軍統領滿洲蒙古綠旗大兵一切事宜爾與副將軍和碩親王額駙策凌副將軍塔爾岱常德叅贊內大臣永福護

軍統領阿岱內大臣伯欽拜公博爾屯等酌定方略  
公同計議而行勿謂已能而不納衆論勿當事會而  
猶復遲迴勝算期於萬全神機定於方寸整衆須如  
山岳之重撻伐以奮雷霆之威鼓勵戎行申明紀律  
遠偵密探先事預防各路大兵及蒙古兵丁聽爾調  
遣凡遇有警即遣發官兵應援撲剿賊中有情急來  
歸者加意撫恤其不抗拒官兵者毋加殺戮凡我將  
弁官員兵丁等其或有臨戰退避擾亂軍機者爾會

同商議文官四品以下武官三品以下即以軍法示  
衆其所犯過小者亦會同商議即行處治毋泯沒行  
間之勞績毋寬縱違法之弁兵軍紀須極嚴明賞罰  
悉期公當相時度勢務合事機有應知會西路寧遠  
大將軍者即行知會一同辦理爾其殫乃心力敷厥  
謀猷早建功勲永綏邊徼以副朕蕩寇除殘息事寧  
人之至意欽哉故勅

庚寅

命黜順承親王錫保爵降丹津多羅濟為郡王策卜登  
為貝勒均留軍効力贖罪

上諭辦理軍機大臣等曰前因大將軍傅爾丹輕進失  
利順承親王錫保在察罕度爾調撥兵丁防範科卜  
多俱屬妥協是以朕格外加恩晉封親王授為大將  
軍及去年賊兵來犯錫保竟不預備奏稱撥兵一萬  
令赴烏遜珠勒而所到之兵僅有三千又將領兵之  
將軍傅爾丹留於大營致賊直越克爾森齊老始遇



額駙策凌將軍塔爾岱等奮勇截殺一面差人呈報  
令其速發援兵而錫保不即發兵俟丹津多爾濟到  
後始遣赴援丹津多爾濟行未十里即劄營住歇是  
時額駙策凌等與賊拒戰二日知援兵不至始各收  
兵回營坐失機會錫保自為大將軍以來每聞賊至  
輒驚惶無措兵丁時撤時撥二年之內馬匹損傷數  
萬闔營無不怨恨夫身膺大將軍之任賊來不能邀  
擊及深入之後又令免脫此皆調遣失宜怯懦畏葸

之所致也深負朕簡用之意理宜從重治罪姑念其  
前歲在科卜多尚能籌畫整備著暫革去大將軍親  
王其順承郡王查應襲之人承襲熙良世子之爵亦  
著革去現命多羅平郡王為定邊大將軍俟到軍營  
時著錫保聽平郡王指示効力贖罪如仍前玩忽經  
平郡王叅奏定行從重治罪丹津多爾濟乃喀爾喀  
一微末台吉蒙

聖祖仁皇帝施恩教育承襲伊父扎薩克貝勒朕御極

之初封為郡王嗣因採買馬駝効力晉封親王屢加恩眷去年額爾得尼招大敗賊人之時伊捏奏冒功朕賞以墨爾根巴魯圖之號賜與黃帶子封其子多爾濟塞卜騰為世子乃於克爾森齊老領兵救援時故意遲延行至十里即安營住歇旋撒兵回營及額爾得尼招接戰之時額駙策凌領右翼官兵奮勇衝擊已將賊兵殲殺殆盡而丹津多爾濟坐擁左翼官兵觀望不前次日衆人皆欲急行追擊伊又支吾逗

留至賊由杭愛山後逃遁伊並不尾追轉由杭愛山之南遶道遲延致誤大事且數年以來所辦馬駝甚屬不堪理應將丹津多爾濟從重治罪但念伊從前採買馬匹曾經効力暫行寬免著削去巴圖魯之號將伊子之世子革退撤回黃帶子革去親王授為郡王仍留喀爾喀副將軍之任辦理未完馬匹之事協助大將軍平郡王料理蒙古事務儻不實心効力仍蹈前轍定行從重治罪策卜登原係扎薩克公先因

追擒脫逃之烏梁海羅卜藏錫喇卜等著有勞績格外加恩晉封貝勒嗣因捏奏蘇克阿勒達呼並額爾得尼招等處擊賊功績朕賞以巴圖魯之號賜與黃帶子晉封郡王今實情畢露方知伊帶兵一千遇百餘賊寇即恐懼不前故張聲勢俾賊遠遁又同塔爾岱領兵追賊誑言迷路縱賊遠颺並無為國効力之實心著革去郡王仍授為貝勒撤回黃帶子其巴圖魯之號亦著革去令往科卜多軍前効力贖罪儻仍

前退縮瞻顧定行從重治罪

丁未

議撥兵防守邊外赤金等處

署陝西總督劉於義奏言邊外赤金等處牧放  
馬駝宜嚴防範請於赤金之南蘇爾河口常瑪  
爾河口等處各撥兵駐劄赤金靖逆之北湃帶  
湖哨防營布魯墩等處各設墩臺撥兵巡察再  
布魯墩哨防營湃帶湖適中之地撥兵三百駐

劄防守辦理軍機大臣等議覆應如所請奏入  
上從之

八月丙辰

上諭辦理軍機大臣等曰據署寧遠大將軍查郎阿等  
奏稱庫爾默圖山地方有逆賊五十餘人來侵被我  
官兵奮力攻擊斬殺二十餘人餘俱生擒未脫一騎  
等語此次經理調撥甚屬可嘉所有効力人員俟查  
郎阿查明等次具奏到日再降諭旨數年以來因西

路將軍等辦理疎忽是以逆賊敢於玩視今賊兵經此番損傷必懷畏懼或於今秋即整兵侵犯西路或於冬天侵犯北路俱未可知著傳諭查郎阿等令其詳悉籌畫辦理

戊辰

命寬給內徙回民應扣口糧總管額敏和卓等照官員例支給粳米

上諭辦理軍機大臣等曰據署陝西總督劉於義等奏



稱吐魯番等處回民已移至安西男婦大小共八千一十三口朕查從前回民自吐魯番移至塔勒納沁時共九千二百七十三口今其中竟有病故例應扣除口糧但伊等甫到安西寧使之食用寬裕著仍照原數支給以示朕格外之恩至總管額敏和卓及伊親丁著照官員例支給粳米以示優異

庚午

命以駐劄涼州河南綠旗兵移駐肅州

署陝西總督劉於義奏言肅州鎮兵除出征撥  
防外現在單弱今涼州現有河南滿洲兵五百  
直隸河南綠旗兵一千駐劄請以河南兵五百  
於十月初移駐肅州餘兵仍留涼州以備調遣  
辦理軍機大臣等議覆應如所請奏入

上從之

丙子

授署正白旗蒙古副都統宗室色貝為正黃旗滿洲副

都統調正紅旗蒙古副都統富達禮為鑲紅旗  
滿洲副都統均仍留軍營

平定準噶爾方略前編卷三十四

欽定四庫全書

平定準噶爾方略前編卷三十五

雍正十一年九月辛巳

命正曹勦縱賊捏報之罪

署寧遠大將軍查郎阿劾奏言總兵官曹勦奉檄於哈密率兵分駐縱賊失機飾詞捏報請即軍前正法刑部等議覆應如所請奏入得

旨曹勦著在軍前即行正法示衆

癸未

命分給回民頭目有功者職銜

署陝西總督劉於義奏言奉

旨給予回民頭目職銜請以所得功次定其品級一等  
頭目給予正千戶職銜二等給予副千戶職銜  
三等給予正百戶職銜四等給予副百戶職銜  
並頒給號紙如例辦理軍機大臣等議覆如所  
請奏入

上從之

乙酉

署寧遠大將軍查郎阿條奏禁止逃兵事宜

查郎阿奏言一律例官軍從征私逃初犯再犯  
以及知罪藏匿悉分別治罪竊恐愚蠢兵丁為  
人所誘誤羅重典嗣後應令所管大臣飭將領  
頭目等以此律曉諭兵丁俾知凜遵一各營自  
將領至什長旗並有管兵之責嗣後責令什長

旗一有逃兵即日報明以次轉報庶便行文飛查勒緝有踰限不報及隱徇者分別治罪如一營中月報一名至十名踰限不獲者所管官兵等亦分別治罪一逃兵有自悔投到者不論初犯再犯悉免其罪入伍隨征定以文到一月為期許於所在赴官投首轉押到營踰限自首者減二等治罪仍許入伍倘自首復逃拏獲即行正法一兵丁潛逃必經汛卡嗣後汛卡兵丁能

查獲逃兵者分別離營遠近賞銀仍記功一次  
其官弁等一并記功如逃兵以本營拏獲者以  
功抵罪至拿獲後訊明沿途經過各汛卡將失  
察官兵分別議處治罪辦理軍機大臣等議覆  
並應如所請奏入

上從之

丙午

命給坐臺陣亡郎中舒紳雲騎尉世職



冬十月壬子

命衆佛保等赴北路軍營

上諭辦理軍機大臣等曰原任侍郎衆佛保著從寬釋  
放同原任巡撫布蘭泰前往北路軍營辦理馬匹事  
務到日聽平郡王指示遵行

辛酉

命噶爾錫等赴洪郭爾鄂隆

上諭辦理軍機大臣等曰洪郭爾鄂隆地方兵丁著副

都統噶爾錫倭星額管領每人賞銀三千兩整頓軍  
裝即馳驛前往噶爾錫著補授正黃旗護軍統領

癸酉

命富德赴北路軍營

上諭內閣曰定邊大將軍平郡王軍營辦事之大臣甚  
少富德著授為額外內閣學士由鄂爾昆前往大營  
令平郡王酌量委用

戊辰

命給額駙策凌定邊左副將軍印信赴科卜多

定邊大將軍平郡王福彭奏言本月十九日臣

遵

旨以定邊左副將軍印信授額駙策凌掌管自烏里雅

蘇台啟行赴科卜多其定邊右副將軍印信亦

令策凌帶往奏入報

聞

庚午

命給還齊旺班珠爾羅卜藏固山貝子

上諭理藩院曰鄂爾多斯扎薩克公齊旺班珠爾羅卜藏深悔上年軍營疎忽之咎此次効力勤勞著加恩給還固山貝子之職

癸酉

議籌大兵分駐防守事宜

署寧遠大將軍查郎阿奏言現今冬令雪深請分駐大兵以慎防守臣等酌定令副將軍張廣

泗駐劄北山其同領兵者內大臣顧魯前鋒統  
領阿思海護軍統領哈岱一等侍衛特庫副都  
統喀喇張正文烏察喇協理台吉羅卜藏總兵  
官張豹張存孝楊琰共領滿洲蒙古綠旗兵一  
萬二百五十名副將軍常賚駐劄南山其同領  
兵者鎮安將軍卓彞前鋒統領宗室哈爾吉副  
都統達什班第提督樊廷總兵官張元佐共領  
滿洲蒙古綠旗兵九千名臣查郎阿與貝子袁

布叅贊穆克登提督顏清如都統根敦散秩大  
臣安楚護原任兵部尚書馬會伯總兵官周一  
德留駐大營營中蒙古綠旗兵三千七百餘名  
臣不時親往南北兩路巡察此外更令總兵官  
張朝良駐劄三堡副將劉廷琰駐劄沙棗泉副  
將馮廷雄駐劄柳樹泉各率兵防守要隘並資  
聲援辦理軍機大臣等議覆如所請奏入

上從之

十一月戊子

命發洪郭爾鄂隆等處兵赴北路軍營

辦理軍機大臣等奏言請選洪郭爾鄂隆等處  
滿洲蒙古兵二三千赴北路軍營以備調遣奏  
入得

旨此所撥兵丁著副都統綽爾多富達禮統領前去伊  
等起程時再著科爾沁固山額駙多爾機虎自京馳  
驛前往同綽爾多等帶領兵丁牧放馬匹到軍營後

多爾機虎再令回京其烏勒輝音扎罕兵丁著教漢  
郡王鄂勒錐圖科爾沁和碩額駙達爾瑪達都帶領  
前去

辛卯

命以薩木哈為定邊大將軍叅贊

上諭辦理軍機大臣等曰據大將軍平郡王叅奏叅贊  
公博爾屯狂妄無知著前赴科卜多聽候額駙策凌  
等調遣効力如仍恣意妄行即行叅奏領侍衛內大



臣薩木哈著調往烏里雅蘇台軍營在叅贊處行走

甲辰

喀爾喀扎薩克鎮國公屠巴卒以其子扎木禪

襲爵

十二月甲寅

命查克旦來京

上諭辦理軍機大臣等曰侍郎查克旦此次辦理巴爾虎事務甚屬明晰目今嚴冬尚非移駐巴爾虎時著

查克旦來京

庚申

署寧遠大將軍查郎阿奏報巴里坤塔勒納沁  
圖古里克等處屯田穫青稞四萬六千一百石  
有奇哈密等處屯田穫青稞四千五百石有奇  
奏入得

旨下部知之

甲子

命調洪郭爾鄂隆馬場蒙古兵八百及滿洲兵一千赴

北路軍營

上諭辦理軍機大臣等曰前曾令調撥洪郭爾鄂隆處  
滿洲兵五百名牧場蒙古兵五百名烏勒輝音扎罕  
蒙古兵一千名於來年草發時遣往北路軍營今據  
平郡王等奏請停撥烏勒輝音扎罕兵丁將洪郭爾  
鄂隆處滿洲兵一千名並揀選牧場察哈爾兵一千  
名遣赴軍前朕思洪郭爾鄂隆軍前不可不留蒙古

兵丁照看牧場著將駐劄洪郭爾鄂隆馬場蒙古兵  
丁一千名內調撥八百名並滿洲兵一千名遣往大  
營令副都統綽爾多富達禮公博爾屯管領前往博  
爾屯到京後再赴洪郭爾鄂隆地方其烏勒輝音扎  
罕蒙古兵內著揀選四百名令額駙達爾瑪達都帶  
領前去

壬申

定邊大將軍平郡王福彭奏報鄂爾昆濟爾瑪

台等處屯田穫大麥小麥糜子共八千六百石  
有奇扎克拜達里克推河等處屯田穫大麥小  
麥共二千一百石有奇奏入得

旨下部知之

甲戌

命以軍前內閣學士阿克敦辦理扎克拜達里克糧餉  
事務

乙亥

命調鑲黃旗漢軍副都統宗室塞布肯為本旗滿洲副都統擢鑲紅旗叅領劉英為鑲黃旗漢軍副都統仍留軍營

雍正十二年春正月庚辰

命博爾屯等赴烏里雅蘇台軍營

上諭辦理軍機大臣等曰公博爾屯著同副都統綽爾多等帶領洪郭爾鄂隆兵丁前往烏里雅蘇台軍營聽大將軍平郡王調遣

癸未

命巴泰回京

上諭辦理軍機大臣等曰北路軍營辦理糧餉之原任工部侍郎巴泰年已衰邁著回京

甲申

命籌備準噶爾詭計遣使求和事宜

上諭辦理軍機大臣等曰據查郎阿摺奏由準噶爾來投之厄魯特巴圖濟爾噶爾稟稱噶爾丹策零欲前

來請和或遣準噶爾之人為使或即用內地之人尚在未定又據賊營脫出投赴北路之人亦稱噶爾丹策零現在行查被獲人等意欲遣還請和等語朕思逆賊欲遣使請和者特為安輯部人紛擾我軍之計耳定非實意若不准其所請則必傳諭所屬曰我為爾等業經引罪求和無柰所請不准用以固結士心而使我軍聞之亦以賊請和而不允遂至懈於効力如此姦謀詭計不可不加詳察爾等密咨兩路大將



軍賊若遣使前來但諭以朝廷欲偃息甲兵使衆生  
樂業屢經遣使爾台吉並無欲和之意每藉端推托  
今果引罪請和須派親信之人如台吉宰桑等將應  
行事宜詳議前來方為奏達乃止令爾等微員及內  
地微末之人前來未便收納如此曉諭方合事宜至  
我兵進剿之計斷不可因此遲回濡滯仍照常整備  
相機舉行

己亥

定邊大將軍平郡王福彭自請以馬場滋生馬  
匹送軍備用

福彭奏言軍中駝馬最關緊要現今喀爾喀扎  
薩克諸藩臣感戴

隆恩莫不竭力辦理如喀爾喀貝勒班第等進獻駝  
馬猶力請停其實給價值伏念遠臣當此軍興  
之際不肯私其所有況臣等宗臣如諸王貝勒  
貝子公等皆有馬場滋生馬匹當需用之時而

置之閒散無用之地豈不內愧於心即臣家稍  
淡薄現有馬場滋生馬五百匹情願自送軍前  
備用伏乞

皇上俯鑒微忱恩准所請並將臣摺交諸王貝勒貝子  
公等一同閱看臣料諸宗臣等必以臣言為當  
踴躍爭先彌切急公之義奏入得

旨交宗人府與諸王等閱看

壬寅

命加查克旦尚書銜

上諭辦理軍機大臣等曰侍郎查克旦此次前往喀爾喀車臣汗部落諸事辦理妥協甚屬可嘉著給與尚書銜賞銀五千兩其入官房地人口俱著給還

二月己酉

命封喇錫塞楞為固山貝子

上諭理藩院曰鄂爾多斯貝勒達什喇卜坦病故爾等因伊怠忽兵事其子喇錫塞楞議降爵鎮國公但喇

錫塞楞深知伊父之罪尚能竭力辦事著封為固山貝子

癸丑

命以馬場挑選兵一千悉赴烏里雅蘇台軍營

統領洪郭爾鄂隆等處兵丁領侍衛內大臣馬蘭泰奏言臣所轄滿洲兵前議調發一千赴烏里雅蘇台大營但此兵沿邊居住日久馬匹不敷應請停止將馬場挑選兵一千盡行調赴以

收實用辦理軍機大臣等議應如所奏令公博爾屯副都統緯爾多先行率往更於滿洲兵中量選六百名令額駙多爾機虎副都統富達禮率領繼之如馬匹等一時採買不及即令停撥奏入

上從之

壬申

命軍行調撥進退機宜聽額駙策凌總理

上諭辦理軍機大臣等曰據大將軍平郡王奏稱塔爾瑪善等進剿行至額爾齊斯河地方見逆賊人衆牲畜盡行收去遂領兵暫回所有懦怯不行速進情由已經移咨飭行等語朕思我軍進襲之處逆賊既已探知先行移避即令深入於事何益平郡王移咨飭行殊為過當軍行紀律甚嚴若以大將軍所諭而塔爾瑪善等竟不遵行固屬未便倘勉強前進而擄掠並無所得方今春令馬匹疲瘦口糧無幾甚為堪虞

斷不得以輕忽貽誤今王之大營現駐迤東離行軍之處甚遠一切軍機所關綦重額駙策凌身在彼地我軍情形逆賊虛實知之必悉嗣後凡調撥進退之處係策凌承辦事件俱聽伊總理著密行知照平郡王及額駙策凌

癸酉

命旺扎爾襲封扎薩克鎮國公

理藩院議奏言喀爾喀扎薩克貝勒諾爾布班



第不能約束屬人以致搶奪糧石牲畜應議處  
今已病故其貝勒爵降二等為扎薩克鎮國公  
令其孫旺扎爾承襲奏入

上從之

甲戌

駐劄西藏鑲黃旗滿洲都統青保大理寺卿苗  
壽綠事革職

命以散秩大臣伯阿爾遜鑲白旗蒙古副都統那蘇泰

赴西藏辦理事務

命以成袞扎布署理喀爾喀副將軍印務

定邊大將軍平郡王福彭奏言署喀爾喀副將  
軍印務貝子阿努里以病不能辦事請遣還游  
牧調治額駙策凌之子台吉成袞扎布明白諳  
練請令暫行署理副將軍印務辦理軍機大臣  
等議如所奏奏入

上從之

三月庚子

命議敘根丕勒擊賊功

辦理軍機大臣等議奏言喀爾喀公根丕勒於  
去年冬月嚴寒之時率領官兵過阿爾台山嶺  
開通雪路百餘里深入賊境直抵察罕呼濟爾  
等處賊衆驚潰拋棄輜重四路奔逸擒獲賊夷  
男婦人口及馬匹牲畜等物因賊既遠遁振旅  
還師甚屬効力應行文定邊大將軍平定王副

將軍額駙策凌等以根丕勒等功績註冊議敘  
奏入

上從之

辛丑

陝西寧夏將軍卓鼐緣事革職

命以直隸天津都統阿魯為陝西寧夏將軍赴巴里坤  
軍營統領西安寧夏滿洲兵陝西寧夏將軍印  
務仍以傅泰署理

夏四月辛亥

命治觀音保阿克山玩悞軍需之罪

先是署寧遠大將軍查郎阿劾奏言江寧副都  
統阿克山荊州副都統觀音保玩愒性成罔知  
法紀所管馬匹倒斃走脫幾十之八三令五申  
悉置不聞明係有心玩悞辦理軍機大臣等遵  
旨議曰馬匹為軍營第一急需阿克山等去年出口所  
領馬匹臆力壯健正值青草發生之時而塔勒

納沁又水草數腴之地乃敢漫不經心虧損累  
累應按律治罪再觀音保前率兵赴陝道出河  
南縱兵踐踏田禾自陝赴肅違例多支料豆出  
口後不能約束兵丁任其脫走今又致馬匹倒  
斃所存無幾視軍令為兒戲尤屬可惡觀音保  
應即行正法以儆將來阿克山應擬斬監候秋  
後處決奏入得

旨觀音保著即在軍營正法阿克山依擬應斬著在巴

里坤城內通衢枷號秋後處決至是

上諭辦理軍機大臣等曰前據署大將軍查郎阿等參奏副都統阿克山觀音保將江寧荊州滿兵馬匹任其倒斃走失應請革職分賠朕因觀音保前年領兵赴陝道經豫省漫無紀律今又將各項馬騾有心怠悞是以特降諭旨令廷臣議將觀音保即於軍營正法示衆因觀音保所犯情罪非止一端原不僅為馬匹故與阿克山枷號治罪之處略有區別殺一人以

做其餘則所全實多今查郎阿等不達朕意奏稱觀  
音保阿克山所屬官兵久居南方初來塞外不知牧  
馬之法致令倒傷較之畏憊退縮偷竊抵換者微有  
差別可否格外施恩將觀音保阿克山暫停正法俱  
在軍營通衢枷號俾將弁觸目儆心等語查郎阿既  
如此陳奏著照所請將觀音保暫停正法同阿克山  
一併在軍營枷號秋後處決將此諭旨曉諭闔營將  
弁兵丁知之



壬子

命加直隸獨石口副將任懷德總兵銜赴北路軍營  
授查爾扈為荊州副都統以黑色署理江寧副都統

署寧遠大將軍查郎阿奏言臣等遵

旨揀選賢能委署江寧荊州兩營副都統現有發往軍  
營効力原任副都統黑色軍前文登營副將查  
爾扈並實心効力奮勉向前可以署理副都統  
管領兩營兵丁奏入得

旨查爾扈著補授湖廣荊州副都統黑色著署江南江  
寧副都統

乙卯

命以頭等侍衛法諸納為正紅旗漢軍副都統仍留軍

營

癸亥

命調鑲藍旗蒙古都統查克旦為本旗滿洲都統仍留

軍營

辛未

命加恩準噶爾降人勞章等

上諭辦理軍機大臣等曰準噶爾投順之勞章伊特格  
勒袞楚克等攜帶妻子百餘口抒誠來降殊屬可憫  
今天氣炎熱即令護送來京路途勞苦著派理藩院  
筆帖式一員攜帶衣服緞疋等物迎往曉諭賞賜令  
其退回會同伊等妻子由驛站緩行護送至察哈爾  
地方該總管等加恩賞賜產業牲畜俟辦理居定後

將為首之人調京引見

命呼倫貝爾管押索倫巴爾虎兵丁前鋒統領博第來  
京調北路軍營內大臣永福統轄呼倫貝爾兵

丁

癸酉

命給紀山副都統銜管轄軍營奉天兵丁

定邊大將軍平郡王福彭等奏言據定邊左副

將軍超勇親王額駙策凌等稱雍正十一年續

到奉天兵二千令領侍衛內大臣薩木哈副都  
統白爾赫圖管領今薩木哈已授為大將軍叅  
贊赴烏里雅蘇台軍營凡遇征勦調遣白爾赫  
圖一人不能兼辦現有軍前刑部員外郎紀山  
老成明白約束有才仰祈

皇上給予副都統職銜令與白爾赫圖分管奉天兵丁  
奏入得

旨紀山著給副都統職銜與白爾赫圖管領奉天兵丁

五月丙子朔

命以原任甘肅布政使諾穆圖協同駐劄哈爾琿圖都  
統覺羅伊禮布辦理事務

壬辰

命以湖北巡撫德齡協同署陝西總督劉於義辦理西  
路軍需事務

乙未

命署寧遠大將軍查郎阿定邊左副將軍額駙策凌來

京詳議進兵事宜

上諭辦理軍機大臣等曰今年進兵之事兩路將軍大臣等所議互異強行進兵賊人預知將那移駐牧先為躲避則我軍徒勞而無所獲勢必復回此事尚無完日朕意今年停止進兵遣使前往宣示利害賊果知懼求和即行定議完結賊若游移推諉則此際預行整備明年大兵即行進剿著額駙策凌署大將軍查郎阿俱來京公同詳議確定於事方為有濟今年

既暫停進兵可令大兵在科卜多相近處擇形勢之地分駐牧馬一應汛哨卡倫嚴行防備

丁酉

命大將軍平郡王福彭等暫赴科卜多總統北路軍務  
副將軍張廣泗辦理西路軍務

上諭辦理軍機大臣等曰北路副將軍額駙策凌侍郎傅鼐學士阿克敦原任侍郎衆佛保西路署大將軍查郎阿俱著馳驛作速來京著大將軍平郡王帶領



傳爾丹暫往科卜多處總統弁兵辦事平郡王未到  
之先著塔爾岱常德等暫行辦理其由烏里雅蘇台  
軍營接運糧餉撥送馬匹等事著交明薩木哈欽拜  
等令薩木哈總統欽拜錫保協辦聽大將軍平郡王  
指示而行查郎阿西路軍營一應事務著交張廣泗  
辦理

命格勒克雅木丕勒暫留科卜多軍營管轄兵丁

上諭辦理軍機大臣等曰額駙策凌來京科卜多軍營

內無總管喀爾喀兵丁之扎薩克大員大將軍平郡  
王現遣喀爾喀副將軍扎薩克圖汗格勒克雅木丕  
勒前往科卜多處送馬匹牲畜著格勒克雅木丕勒  
暫留科卜多軍營管轄喀爾喀蒙古兵丁

己亥

命來保等暫赴車臣汗部落協同查克旦辦事

庚子

命駐劄達里剛愛統領蒙古兵丁散秩大臣塞楞來京

六月庚戌

命以洪郭爾鄂隆所調滿洲兵赴烏里雅蘇台軍營

定邊大將軍平郡王福彭奏言烏里雅蘇台扎  
克拜達里克推河等處並應撤京城滿洲漢軍  
右衛寧夏察哈爾土默特兵凡三千六百臣遣  
官率還所在給予錢糧米石車輛如例所有內  
扎薩克及烏蘭察卜兵三百七十調赴推河駐  
防現在除撤還兵丁外烏里雅蘇台餘兵九千

不敷調遣請以洪郭爾鄂隆所調滿洲兵六百  
再增撥四百令富達禮等率赴軍營辦理軍機  
大臣等議覆悉如所請奏入

上從之

庚申

命議駐劄達里剛愛扎薩克王等輪班管轄兵丁

上諭辦理軍機大臣等曰達里剛愛地方駐防之西林  
郭勒兵二千名從前派出時連妻子牲畜一併帶往

駐劄間管轄伊等之扎薩克王等惟本身前往又不  
換班在彼常駐從前烏勒輝音扎罕之兵其王貝勒  
台吉等俱係一年一換今達里剛愛之王等或令伊  
等換班行走或帶往妻子永遠駐劄之處著詳議具  
奏尋議曰前者駐防達里剛愛等處兵但令阿霸琰  
王扎木巴勒扎卜烏珠穆秦公彭蘇克喇卜坦  
等管轄未嘗議及換班今請以蘇尼特王旺青  
齊斯隆貝勒西禮二人輪班管轄今年令旺青

齊斯隆往代扎木巴勒扎卜明年令西禮往代  
彭蘇克喇卜坦奏入

上從之

己巳

命薩木哈掌管威遠將軍印信

定邊大將軍平郡王福彭奏言臣遵

旨率傅爾丹等赴科卜多軍營令薩木哈等辦理烏里  
雅蘇台軍務遇有調遣須以印文為憑謹以臣

處收貯威遠將軍印一顆付薩木哈掌管復授以方略令欽拜錫保同心贊襄奏入報

聞


庚午

命治西琳負恩挾私之罪

定邊大將軍平郡王福彭劾奏言辦理扎克拜達里克糧餉事務原任巡撫西琳不知飭已劾力恣意卑污索取叅將王化貴駝馬不遂詭詞

檄報擅革王化貴管兵之任負恩挾私有玷官  
箴臣已訊實請由驛站解部定擬奏入得

旨西琳不必解京即令在扎克拜達里克地方永遠枷  
號示衆





平定準噶爾方略前編卷三十五